

Duke Croes:

NEL ODUBER BIBANDO CU MIEDO Y DESESPERACION

ORANJESTAD(AAN): "Ta un Statenlid di MEP bo mester ta pa no compronde e pensamentonan y expresionnan di Sr. Nel Oduber, pasobra tur hende cu tiki inteligencia for di basta dia caba por a compronde profundamente cu mi tin cu baha te na un nivel asina abao pa Sr. Nel Oduber por comprendemi", ta locual Sr. Duke Croes a comunica na DIARIO ayera.

E flamante miembro nobo di parlamento a bisa cu remarcable ta cu for di diamrs Nelson Oduber ta haciendo saltonan di panico y desesperacion masha grandi mes y cu ta for di momento di tratamiento di su credencialnan den Parlamento ta tende Nelson Oduber gritando barbaridadnan manera "un alma malo," aunke prome cu esey de vez en cuando e tabata bisa algo sensato.

"Ata de pronto Sr. Nel Oduber a bira e ferviente defensor di Sr. Willie Willems, Sr. Edwin abath y Sr. Gaby Werleman. Di un forma "achterbaks" e ta admira e capacidad, talentonan y honestidad di e integrantes aki di AVP. Consequentemente e ta elogia e composicion di lista di candidato di AVP".

"Den e mesun rosea e ta demostra claramente cu e no tin ni e minimo vision pa por compronde e forma profesional y dinamico cu partido AVP ta traha. E organizacion AVP basa riba eficiencia, productividad y division di tarea, ta asuntonan cu e mente di Sr. Nel Oduber cu ta condiciona na unicamente patronahe politico, no por capta", segun Sr. Croes.

E parlamentario a duna di conoce ademas cu Sr. Nel Oduber aparentemente tin problema su su ingreso den parlamento, pa no bisa "miedo", pasobra Sr. Oduber sa cu e ta un verdadero representante di cierto barionan y pueblo di Aruba en feneral cu Sr. Oduber y su partido "a defrauda y engaña asina cruel."

"Pero tambe henter e dinamismo y logronan grandi di e gobierno di AVP-OLA tin

e totalmente desespera. E ta riparando cu e ambiente di harmonia y hermandad cu e gobierno ta trahando na bienestar di pueblo ta haci su chance di un dia den futuro lejano bolbe na poder, completamente imposible".

"Ta pesey e ta haciendo tur lo posible pa den tur forma bay den contra di e deseo di nos pueblo y kere di por trece division den gobierno o parlamento. Su corazon ta troce pa trece un discordia entre Sr. Gabi Werleman y Sr. Willem Vrolijk y demostrando su incompetencia e ta papiando di cierto rapportnan cu a wordo produci duante su gobernacion. E sa masha bon cu tur informacion cu por a wordo usa den e tempo cu e tabata minister -president contra Sr. Gabi Werleman, a wordo usa.", segun Sr. Croes.

E parlamentario nobo di AVPO a sigui menciona cu e daño cu Sr. Oduber como minister president na cabez

di su gabinete a ocasiona na Sr. Gabi Werleman y su familia tabata grandi.

"Pero justicia y verdad a vence e sed insasiable di persecucion politico di Sr. Nel Oduber. Y tin si rapport cu eventualmente no a wordo publica y esey ta demostra cu ta Sr. Oduber mes a faya. Apesar di tur investigacion nos justicia

imparcial a declara Sr. Gabi Werleman un homber corecto y clean".

"Pero di con e investigacionnan na keuringslokaal na San Nicolas, Hulpbestuurskantoor na Savaneta y Aeropuerto si nunca a wordo termina y haci conoci na Pueblo Sr. Nel Oduber?"

"Contrario, na negativismo y rencor di e lider di MEP nos pueblo ya ta demostrando cu e fraternidad, colegialidad y conviccion entre e partidonan di gobierno ta e condicion indiscutible pa hiba nos hendenan na e felicidad tan anhela. Sr. Nel Oduber, exito cu bo recuperacion!" Segun Sr. Duke Croes.

GOTCHA - PAINTBALL BATALLA

ORANJESTAD(AAN): Esaki ta e wegá di tiramento cu bala di verf cu ta hopi inn e ultimo tempo aki na Aruba.

E team di DIARIO ta invencible te aworaki y ta parce cu e team di canal 90, tin hopi miedo pa enfrenta DIARIO den e encuentro deportivo aki.

Gotcha ta worde hunga cu un team di 10 persona y

DIARIO su team ta cla caba pero ta parce cu e team di Canal 90 no por worde forma te ainda.

Rumornan ta coriendo cu te hasta for di exterior nan a manda busca resfuerzo pero tur esaki lo ta envano.

Rambo Hart di DIARIO ta cla pa lanza balanan di verf ariba E Toronan di Canal 90, pasobra anque cu e hungadornan di Canal 90

sconde tras di e mantel cora, e manchanan di verf lo muestra e impacto di e Ofensiva-Hart

Ta parce cu Paskel a haci un peticion ariba nos Ministro di Defensa pa haya ayudo pero te ainda no tin nada.

DIARIO Comandos ta bisa Canal 90: Toronan prepara pa e SPLASH DI VERF CORA.

DIARIO GOTCHA (GOT YOU)

